

**Nunaqarfinni innuttaasut peqqinnissaqarfiup allalluunniit assingusumik piginnaaneqartut ingerlatassaannik inuunernik peqqinnermillu annaassiniarluni ikiueqqaarnernik pikkorissartinneqartalernissaannik pisariaqartitsinernik periarfissanillu Naalakkersuisut peqquneqarnissaannik Inatsisartut aalajangiffigisassaatusiunnersuut.**

**Misissuineq ukioq 2019 naatinnagu qanoq aningaasalersorneqarnissaanut pisariaqartitsinerit periarfissallu Inatsisartunut saqqummiunneqassaaq.**  
(Inatsisartunut ilaasortaq Doris J. Jensen, Siumut)

### **Akissuteqaat**

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

### **Siullermeerinninneq**

Inatsisartunut ilaasortaq, Doris J. Jensen, Siumut, siunnersuuteqarneranut Naalakkersuisut qujapput.

Ullumikkut nunatsinni ilungersunartumik ajunaartoqartarnera siusinnerusumut sanilliullugu qujanartumik akuttornikuuvoq. Siusinnerusukkut ajunaartoqarnerata kingunerisaanik pisut amerlapput toqusartullu amerlallutik. Ullumikkut pisartut pitsaanagerusumut saallutik allangornikuupput. Taamaattorli innuttaasut tassanngaannartumik uummaliulernermik, inuuserlernermik allatullu tassanngaannartumik napparsimalernermik nalaataqartartut amerlinikuupput. Tamatumanilu peqqinnissaqarfimmi suliamik ilisimasallit takkunnissaasa tungaanut napparsimasumik ikiueqqaarnissaq pisariaqartinneqartarluni.

Siunnersuuteqartup eqqortumik oqaatigaa ajutoornerit sukkuunniit pisinnaasut. Naalakkersuisuniillu isumaqatigineqarpoq ajutoortoqartillugu imaluunniit tassanngaannartumik napparsimalertoqartillugu ikiuuttussaviit pissarsiarineqarsinnaaneranni piffissaq sivisooq ingerlasinnaammat, taamaattumillu nunaqarfimmi innuttaasut imminnut ikiorsinnaanissaat immikkut pingaaruteqarmat.

Ajutoortoqartillugu tassanngaannartumilluunniit ilungersunartumik napparsimalersuortoqartillugu nunaqarfimmi sulisut, soorlu peqqinnissakkut sullissisup, kommuneqogedip, qatserisartut nunaqarfimmilu aqutsisut tassanngaannartumik pisuni kikkut qanoq iliuuseqartarnissaat ilisimappassuk pitsaasuussaaq.

Ingerlatsiveqarfiit assigiinngitsut suleqatigiinnerannut assersuutitut taaneqarsinnaavoq imminnut toqunnissamik pitsaaliuinermi nunap immikkoortuini politiit, peqqinnissaqarfiup kommunillu akornanni tulleriiarluni iliuuseqarnissamut malitassanik suleqatigiittoqarnera.

Imminut toqunnissamik siorasaarisoqartillugu, imminut toqoriartoqartillugu imminullu toqussimasoqartilluguluunniit kikkut attavigineqartassanersut tulleriarluni iliuuseqarnissamut malittassani ersarissumik allassimavoq.

Tulleriarluni iliuuseqarnissamut malitassat assigisaalluunniit nunaqarfinnut ataasiakkaanut naleqqussakkat aallaavigissallugit nunaqarfimmi ajutoortoqartillugu ataqatigiissaartumik suliniarnissamut pisariaqartinneqarsinnaasut Naalakkersuisut isumaqarput.

Siunnersuuteqartup siunnersuutigaa nunaqarfinni ikiueqqaarnermut pikkorissarnernik neqerooruteqartarnissaq Peqqinnissaqarfimmit ingerlatsisumilluunniit allamit akisussaaffigineqassasoq. Ikiueqqaarnermik pikkorissartitsinerit ullumikkut ingerlatsisunit arlalinnit neqeroorutigineqartareerput, soorlu Kalaallit Røde Korsianit, soorluttaaq kommunimi upalungaarsimanissamut suliassaqarfimmi ikiueqqaarnermik ilinniartitsisoqartartoq.

Naalakkersuisut isumaqarput innuttaasut ikiueqqaarnermik pikkorissartinneqarnissaat peqqinnissaqarfiup akisussaaffingnikkaa. Taamaattorli nunarfinni ajutoortoqartillugu tassangaannartumilluunniit pisoqartillugu suleqatigiinnerup ataqatigiissarinerullu qanoq pitsannorsarneqarsinnaanerit, tassungalu ilanngullugu ikiueqqaarnermik pikkorissartitsinerit oqallisiginissaannut Naalakkersuisut suliniuteqarlutik aallarniisoorusupput.

Naalakkersuisut imaattumik allannguutissatut siunnersuuteqarput:

*”Nunaqarfinni tassangaannartumik pisoqartillugu pitsaanerusumik ataqatigiissarinissamik periarfissat, tassungalu ilanngullugu ikiueqqaarnermik pikkorissartitsinissamik pisariaqartitsinerit ingerlatsiveqarfinnut susassaqartunut oqaloqatigiissutigiginissaat kingusinnerpaamik 2019-ip naanerani Naalakkersuisut aallarnisassavaat”.*